



## STINAPA TA INFORMA

E SIRKULO DI BIDA

Dolfy Davelaar ta unu mas di e personahenan markante ku Boneiru tin tantu di dje. Despues di un imposante karera di masoménos 35 aña den Kuerpo Polisial, “Mayor Davelaar” (manera tur hende tabata yam’é) a pensa ku ainda tabatin hopi kos di hasi p’e. I asta awor, na edat di 67 aña, no ta fásil pa logra un sita kuné. Si e no ta okupá ku su programa na radio, e ta dediká tempu na su miembresia di Rooms-katholiek Schoolbestuur òf di Voogdijraad. Fuera di esei, e tin sentenáres di aña kaba na kabes di e koro mas konosí di Boneiru: “Kanta Orkidia” i tambe tin agentenan di polis i siudananan regular ku ta akudí serka dje pa kualke konseho òf pa yuda skirbi karta ofishal. “Awor mi ke duna bèk na komunidad di Boneiru” e ta splika. “Mi no tin niun interes pa sinta bebe serbes bou di un palu, pasobra ta stima mi ta stima e isla aki. T’asina m’a yega di puntra un turista si e konosé promé parti di beibel. Pasobra si e kier a sa ta unda Dios a pone Adam ku Eva na mundu, tabata na Boneiru, e Paraiso riba tera.” “Mi tata tabata un polis prosedente di Kòrsou i mi mama tabata di Boneiru. Ami mes tin dos yu mayó di edat awor. Tempu ku mi a lanta no tabata fásil pa haña trabou aki riba. Mi a bai skol na Kòrsou i despues m’a purba un tempu na Aruba. Pero finalmente m’a haña un bon trabou na Aerocarto, un kompania ku tabata pone Boneiru riba mapa ku ayudo di pòrtrètnan saká for di avion. E pòrtrètnan ei ainda ta kologá na kadaster entre otro. P’esei mi sa bon kon bunita Boneiru tabata un tempu. Ora bo puntrele pa e diferenshanan ku e ta mira den naturalesa anto, Dolfy ta menshoná e áreanan kantu di laman. “Tin biaha mi ta kana keiru banda di e edifisionan haltu ei anto mi ta puntra mi mes ta kiko nos ta bezig kuné”. Meskos ku e konstrukshonnan nobo na Seru Largu ei. E vegetashon ei no ta sufri hopi? Anto ántes nan tabata kap palu pa kima karbon tambe, pero hendenan tabata solamente kue lokual nan mes tabatin mester. Hende a bira hopi materialista despues, voral awendia. Kimamentu di karbon a bira negoshi, i nan ta kap mas i mas palu. Pone huntu k’esei e malesanan ku a reina bou di sierto palu (manera watapana), i bo tin un problema grandi. “Na e momentu aki e temporadanan malu di áwaseru tambe ta un problema grandi. Ántes esnan ku tabatin kunuku tabata traha dam ku tanki pa evitá ku e áwaseru ta bai laman mesora. Asina e tera tabata keda friu pa mas tempu i vegetashon tabata haña un mihó chèn. Un problema ta ku niun hende no ta kuida e damnan mas, òf pió ainda, ku a traha kas na nan lugá. Asina e tera ta seka. Ora ku pidi Dolfy un konseho pa e hendenan di e isla e ta ofresé un ehèmpel. “Tin biaha mi ta bai piska, ta un kos ku mi gusta hopi, e ta relahá mi. Anto ora mi a kue tres carañito pareu asina pa mi famia mi ta bai kas. Mi no ta sigui te ora mi no ta kue nada mas, djis pasobra nan tei. Asina bo ta duna naturalesa un chèn. Anto asina bo por sigui hopi tempu ainda. Esei ta e Sirkulo di Bida.”

*Skirbí pa Marcel Nahr*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**